



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1185/09
Sarajevo, 30.7.2009. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 31-07-2009			
Organizaciona jedinica	Klasifikaciona oznaka	Redni broj	Broj priloga
01-50-1-15-50		09	

PARLAMENTARNA SKUPŠTINA
BOSNE I HERCEGOVINE

- Zastupnički dom -

SARAJEVO

PREDMET: Odgovor na zastupničko pitanje – dostavlja se

Vijeće ministara Bosne i Hercegovine, na 95. sjednici održanoj 23.7.2009. godine, utvrdilo je Odgovor na zastupničko pitanje koje je Vinko Zorić, zastupnik u Zastupničkom domu Parlamentarne skupštine Bosne i Hercegovine, postavio na 50. sjednici ovog doma održanoj 1.4.2009. godine.

U pravitku dostavljamo Odgovor uz molbu da isti uručite zastupniku.

S poštovanjem,



GENERALNI TAJNIK ←

Zvonimir Kutleša



**BOSNA I HERCEGOVINA
VIJEĆE MINISTARA**

Broj: 05-50-1185/09
Sarajevo, 23.7.2009. godine

Vinko Zorić, poslanik Predstavničkog doma Parlamentarne skupštine Bosne i Hercegovine, na 50. sjednici Predstavničkog doma, postavio je sljedeće posalničko pitanje:

« Šta čine institucije Bosne i Hercegovine u cilju rasvjetljavanja zločina u i nakon 1945. godine, koji su počinili partizani i komunisti s posebnim naglaskom na identifikaciju žrtava ali i zločinaca u nedavno pronađenim masovnim "grobnicama" u Vrgorcu i slovenskom rudniku Barbarin rov kod sela Huda Jama u blizini Laškog? »

Na postavljeno poslaničko pitanje, Vijeće ministara Bosne i Hercegovine, u smislu člana 37. Zakona o Vijeću ministara Bosne i Hercegovine («Službeni glasnik BiH», broj 38/02), na 95. sjednici, održanoj 23.7.2009. godine, utvrdilo je sljedeći

O D G O V O R

Po informacijama pribavljenim od više institucija u Bosni i Hercegovini nema saznanja da su preduzete aktivnosti u cilju rasvjetljavanja zločina u i nakon 1945. godine, koji su počinili partizani i komunisti u nedavno pronađenim masovnim "grobnicama" u Vrgorcu i slovenskom rudniku Barbarin rov kod sela Huda Jama u blizini Laškog, a razlozi su sljedeći:

Važenje, odnosno primjena krivičnog zakonodavstva u zemljama bivše SFRJ (u većini država u svijetu) je po *teritorijalnom principu*, kao polaznom i osnovnom principu prostornog važenja krivičnog zakonodavstva. Po tom principu krivično zakonodavstvo važi za svakoga ko na teritoriji države izvrši krivično djelo bez obzira na državljanstvo učinioca. Prihvatanje ovakvog načela važenja i primjene krivičnog zakonodavstva u skladu je sa vladajućim shvatanjem o legitimnosti i suverenosti svake države da na svojoj teritoriji osigura primjenu svojih zakona, tj. da sudi za sva krivična djela izvršena na njenom području.

Međutim da iz bilo kojih razloga učinioci naročito teških krivičnih djela, a pogotovo ratnih zločina ne ostanu nekažnjeni, a cijeneći karakter i značaj zaštićenog dobra koje je napadnuto ili ugroženo učinjenim krivičnim djelom, kriminalnopolitičke razloge, postoji međunarodna obaveza ili solidarnost u suzbijanju i kažnjavanju teških krivičnih djela.

Krivična djela ratnih zločina predstavljaju povredu pravila međunarodnog prava i spadaju u oblast međunarodnog krivičnog prava. Prvi akti kojima su definisana zabranjena ponašanja u ratu bili su Petrogradska deklaracija iz 1869., Ženevska konvencija iz 1874. (zaštita ranjenika i bolesnika) i Haške konvencije (1889-1907. god.). Odredbama Versajskog ugovora zaključenog nakon Prvog svjetskog rata bila je predviđena mogućnost da savezničke države sude ratnim zločincima pred domaćim sudovima za djela protivna ratnim zakonima i običajima rata. Poslije Drugog svjetskog rata zaključivanjem Sporazuma Savezničkih vlada o gonjenju i kažnjavanju ratnih zločinaca (zaključen u Londonu 8. avgusta 1945. godine) i osnivanjem Međunarodnog vojnog suda odnosno donošenjem Statuta međunarodnog vojnog suda prvi put u istoriji čovječanstva došlo je do suđenja i kažnjavanja ratnih zločinaca (Nirnberški i Tokijski procesi). Doneseni su i mnogobrojni drugi akti iz ove oblasti.

Zbog posebne težine ovih krivičnih djela, krivično gonjenje i izvršenje kazne ne zastarijeva za krivična djela ratnih zločina, kao ni za ostala krivična djela za koja po međunarodnom pravu ova zastarjelost ne može nastupiti (Konvencija o nezastarivosti ratnih zločina i zločina protiv čovječnosti iz 1968. godine).

Dakle, aktivnosti u vezi rasvjetljavanja događaja u vezi pronađene masovne grobnice u Republici Sloveniji je shodno teritorijalnom principu u nadležnosti organa Republike Slovenije, te ukoliko se zatraži saradnja u rasvjetljavanju ovog zločina, Bosna i Hercegovina će odgovoriti u skladu sa međunarodnim obavezama i u skladu sa bilateralnim ugovorom između naše dvije države. Obzirom da ratni zločini predstavljaju povredu pravila međunarodnog prava i spadaju u oblast međunarodnog krivičnog prava cijeni se da će Republika Slovenija postupiti u skladu svog domaćeg, a i međunarodnog zakonodavstva.

Nadalje, ukoliko se pojavi interes porodica žrtava, Bosna i Hercegovina će međusobnom koordinacijom Ministarstva pravde, Ministarstva za ljudska prava i izbjeglice i Ministarstva vanjskih poslova ostvariti komunikaciju i preduzeti aktivnosti u vezi identifikovanja posmrtnih ostataka članova porodice koji su državljani Bosne i Hercegovine, ili druge aktivnosti za koje se ukaže potreba.